

## 每週經課朗誦經文(巴克禮台語漢字)2013/10/06

### 共同經課 - 1 耶利米哀歌一章一節~六節

1 唉啊！此個城從前百姓滿滿，今怎樣孤單啲坐！從前佇列國中做大的，今竟然親像寡婦；從前佇諸個省中尊伊做王后者，今成做進貢者。2 伊暝間大啼哭，目屎流到滿面；佇一切親愛的人的中間無一個安慰伊。伊的朋友攏用詭詐款待伊，in 成做伊的對敵。3 猶大因為抵著苦難，閤因為受著多多勞苦就遷徙到外邦。伊踎佇異邦中，無通尋著安息；追趕伊者佇狹狹的所在攏趕著伊。4 錫安的路徑悲傷，因為無人赴伊的節期；伊的城門攏冷靜；伊的祭司吐氣；伊的在室女艱難，伊本身也憂苦。5 伊的對敵做頭；伊的仇讎亨通；因為耶和華為著伊多多悖逆，互伊受苦；伊的团仔互對敵掠去。6 錫安的查某子，伊的媛一盡無去。伊的貴族親像尋無草場的鹿；in 無氣力，受趕佇追趕的人的面前。

### 共同經課 - 2 詩篇一百三十七篇

1 阮曾坐佇巴比倫的河邊，一下想著錫安目屎就流。2 阮將阮的琴吊佇彼位的柳樹；3 因為佇遐，掠阮者愛阮唱歌，搶阮者愛阮快樂，講：恁著給阮唱一首錫安的歌！4 阮佇外邦豈可會唱耶和華的歌？5 耶路撒冷啊，我若袂記得你，願我的正手失落伊的本事！6 我若袂記得你，若無看耶路撒冷卡過頭佇我所第一歡喜的，願我的舌粘佇我的上脣(kiu")！7 耶路撒冷抵著患難的時，以東人講：拆毀伊！拆毀伊！直直拆到地基！耶和華啊，求你記得彼日！8 啲欲受滅的巴比倫城啊，報應你親像你款待阮的，彼號人有福氣！9 掠你的嬰仔摔佇石磬的，彼號人有福氣！

### 共同經課 - 3 提摩太後書一章一節~十四節

1 對上帝的旨意，照佇基督耶穌活命的應允，做基督耶穌的使徒保羅，2 批寄互我所疼的子提摩太。願你對父上帝及咱的主基督耶穌得著恩典、憐憫、平安！3 我感謝上帝，就是我續接列祖用清氣的良心所服事的。佇祈禱的時，我數念你無息，4 記得你的流目屎，暝日欣慕見著你，互我滿心歡喜。5 念著你心內無假的信，此個信是代先惦佇你的外媽羅以及你的老母友妮基，我深信此個信也是惦佇你。6 為著此個緣故我點醒你，愛你將上帝對我的按手所互你的恩賜閣奮志，親像互火閣炎一樣。7 因為上帝所賞賜咱的，毋是驚惶的心神，就是權能、仁愛、守己的心神。8 所以給咱的主做干證莫得掠做見誚，也莫得掠我做主的囚犯來見誚；著照上帝的權能，為著福音相及受苦。9 伊救咱，用聖的召召咱，毋是照咱的行做，是照伊家己的旨意及恩典；此個恩典就是永世代的代先，佇基督耶穌賞賜咱的，10 若是現今對咱的救主基督耶穌的顯現來表明的。伊已經廢無死，閤對福音，互活命及袂敗壞的攏顯明。11 我為著此個受設立做宣傳的，做使徒，做教師。12 為著此個緣故，我也受諸個艱苦。若是我無掠做見誚；因為我識我所信的，也深信伊會保守我所交託伊的，到佇彼日。13 你對我所聽見許個端正的話的模樣，著用佇基督耶穌的信及仁愛，來執守伊。14 所交託你的好事，你著倚靠惦佇咱的聖神來顧守伊。

### 共同經課 - 4 路加福音十七章五節~十節

5 使徒給主講：「加添阮的信。」6 主講：「恁若有信親像一粒的芥菜子，就命令此欖桑材樹講：『拔你的根，去栽佇海裡』，伊也欲順趁你。7 恁中間甚麼人有奴僕啲作園抑是顧羊，對園裡倒來，豈欲給伊講：『即時坐來食』嗎？8 豈無欲給伊講：『備辦互我食，緒帶來服事我，聽候我飲食息，你才通飲食』嗎？9 奴僕行所命令的，豈有給伊說謝嗎？10 按呢，恁已經一盡行所命令恁的，就著講：『阮是無利益的奴僕，行所應該行的若定。』」